

无如之何也。

十五日。复曾摯民一信，以摯民前信由专足来省，比因接取回信，始知之。以中秋节贺客盈门，例从逊谢，反获清闲一日。午邀曾岳生、周良臣、刘小山及易淑子、李麓渔、杨瑞堂、周浥藻、易叔辉及寅伯为中秋小饮之会。夜乘月色与易叔辉散步又一村前，晤（叔）〔淑〕子、仲子、麓渔、浥藻诸人，相与出贡院街，绕由清泰街、营盘街而归。市肆阴蔽，不见灯月，惟又一村地敞，得月为多，此为中秋玩月第一胜境也。

十六日。接曾沅甫宫保信七月廿九日获鹿县发，又接李筱荃制府信八月初九发。沅甫抄示七月廿六日上谕一通，令急诣防布置，无容来京。似军情甚急者。而筱荃录示上海报单，则言劫刚至俄，略有定议，俄人已止续调之军，暂驻地中海。沅甫并寄示汪子常大令信，言慈禧太后病情，投药已效，渐次可以就愈。此皆率土臣民所同庆幸者。徐仁曦固求一信诣山海关，为致曾沅甫一信，并以朱香荪信汇寄。此事绝非本心，而无力拒绝之，以由寒士出身，不忍人之求故也。为周浥藻报捐从九赴浙江，约十七日启行。传问之，则百事无一有。初以为制备衣服即可，至是始知靴履皆无有，衣箱行李更无论也。

十七日。遣杨瑞堂赴上海，致叶顾之、唐景星、徐裕之、周瀛士、黄泳清各信。周浥藻亦定是日赴浙江，为致谭文卿、唐砚农二信，而浥藻以所事未及清检，改期廿一日，其信亦并交之。曾岳生、邓弥之过谈。晚次，朱香荪、罗小垣、盛燮甫又过谈。香荪见示小诗云：飓风吹浪浪滔天，簸跌江湖大小船。渔父不知溪水涨，芦花深处独酣眠。吾谓此诗有外视天下之意。方今天下一家，治乱同之，岂视外视，因和云：挈舟出海浪翻天，满载痴顽共一船。无计收帆风更急，那容一枕独安眠！